

Kiwiini'o Peter Kaaritan

Di'oraz kaarita dava'a'o

Di'oraz kaarita kiwiitapa'o Peter kaaritan. Usaadanii mishidapainao Jesus ati'o, mashaapainaouz Asia Minor Baara ii aka kida'oraz. Peter, uruu 12 Jesus apostlennao bii iki'o.

Uruu dono mishidapainao, Asia Minor iainaouz pataka'uta-kao pamishidapan dikan ii Jesus, Tominkaru daniz. Uruu idi Peter saadan pakaaritan i'ati uma'ozakada-kinia nii ūyaun. Peter nyukunuu-kidan i'ati na'apa'o Jesus baiatanii tuukii, ūnao dikan ii. Ukau'an marii kizi ūda'anan Jesus kaduz pama'ozakadapan ida'an panyukunuu. Na'iki pataan ida'an panyukunuu ati, pamishidapan Tominkaru. Peter na'apanuz i'ati kaikapa'a, Tominkaru zaamatan idi ūyaun papidanannao nii. Na'iki Jesus baiainpna na'iki umawakan idi i'ati, marii ūmashaapan Tominkaru aipan kawana'ati'i naa.

Kaarita buutinpan kida

Kaarita sakadin-kizi	1:1-2
Tominkaru kazannaatan dava'a'o pidannao	1:3-12
Kakinaowapa-karu kaimana'o mashaapa-karu dau'u .	1:13—2:10
Baiainapa-karu Jesus Christ kawan	2:11—4:19
Mishidapainao Christ sha'apatan ni'o	5:1-11
Kaarita katokon-tinan	5:12-14

1 ¹Di'oraz kaarita ūgaru Peter di'iki'o. Ūgaru Jesus Christ apostlen. Ūsaadan di'oraz kaarita Tominkaru zaamatanii papidanannao nii ati'o, makoinaouz ūmashaapa'anen tawarainao kawan di'itinapa kida'a ba'oran kaduz pidannao wiizi ii aka kida: Pontus ii aka, Galatia Baara ii aka, Capadocia ii aka, Asia Baara ii aka

na'iki Bithynia ii aka. ²Wuru'u waDaru Tominkaru zaamatanuz unao, udi'itapani'i naa kotua'a naa pazaamata'azon dau'u unao. Ukau'an Kaimana'o Doronaa saabaani'i naa unao kaimanaiman, uruu ida'an uizo'atin naa Jesus Christ na'iki uchikaa-kaoa'a naa u'oian ai uizain ida'an.

Marii Tominkaru kamunanun

u'ati na'iki utaa kizi unyukunuu kaiman-kinaa nii tuukii manawun.

*Zaudapa-karu mish'i'o
sha'apa'azo'o dau'u*

³Wakonaukii-kida Tominkaru, wanaobanaa Jesus Christ daruz. Ukamunanban idi manawun, utaan wa'ati pa'ina'o mashaapa-karu pakadishita-kidan ida'an Jesus Christ pamawaka-kizi iki, uruu idi'o wamashaapan zaudapatina'a naa. ⁴Wazaudapan naa wazaamata'azoniaz wa'idiwau nii kaimana'o aimakan Tominkaru taapaniaz wa'ati aokazi ii. Na'ii aona'o kanom ka'iitan pamainaabatan oo papataka'uanuz. ⁵Unao, umishidapan idi Tominkaru, utaapan unao pama'ozakan ida'an atii uzaamatan kazannaatin-karu, ata'azo'oraz naa uaida-kao amazada tokono dono'o naa. ⁶Ukau'an ukonaukia'a naa tuukii udau'ati, ukasha'oratinan pu'u padamata, na'iki ubaiatan iriba dikauda kida'o aimakan. ⁷Mazan na'apa kida'oraz sha'apan, umishidan tiwaa-kao wuru'u, na'apa'o ida'ana'o nii utukapa-kao mish'i'o wuru'u umishidapanuz. Aizii gold kawaoda-kao tikazi di'iti, utukapa'azoo-kao idi mish'i'o uruu gold, mazan upu'a'o nii umainaabata-kao. Mazan wuru'u umishidapanuz, powa'a'o zii umanawunun gold ai. Uruu idi'o utiwa-a-kao utukapa'azoo-kao uturuuan. Uturuudinan dono, Tominkaru konaukii-kidan nii unao, na'iki utukapan nii unao umanawunu'o nii, na'iki unaubaan

nii unao Jesus Christ tukapa-kao dono'o naa.

⁸Aonaa utukapanii mani uruu, mazan upu'u umarainapanuzu. Kai, aonaa zii utukapanuzu mazan upu'u umishidanuzu. Uruu idi'o wuru'u umashaapanuz kai konaukii. Ukonaukian umanawunu'o konaukii-karu ida'an, aonaa pidan aitapan na'apam pakian udau'an. ⁹Umishidan idi uruu, uturuudinan naa uzaamatan kazannaatin-karu, upataka'uta-kao ai u'oian dikan ii.

¹⁰Wuru'u kazannaatin-karuz oia'o ai, uruu Tominkaru prophetin-nao di'itapanii kaimanaiman kotua'a naa. Tuukii ūipan paaitan udau'an, uruu ūkowaadaniaz sha'apatina'o ni'oraz Tominkaru kamunan-kinaaz, wuru'u utaaniaz unao ati. ¹¹Christ doronaa da'i prophetnao ida'a'oraz, uruu ida'ana'o ūaitapan pakowaadan aimakan sha'apa'o nii dau'an usha'apan ua'ii zii. Uruu idi'o ūkowaadapanuz Christ baapan ni'o dau'ati na'iki udauna'an umanawunuta-kao ni'o dau'ati. Na'apa kida'o dau'an prophetnao kaudinan dadara ūtiwaan padi'itapan na'apainim nii na'iki na'apam nii usha'apainpan wuru'u Christ doronaa kowaadauta-kidaniaz ū'ati. ¹²Tominkaru kainaabatan ūnao prophetnao ati wuru'u ūkaudinkiziz ūkowaadautaniaz, aona'o nii ūtukapan usha'apan, mazan unao ati'o nii pa'an wuru'u aimakan kida sha'apanuz. Ukau'an uru'u naa kakuwaapainao kowaadaniaz naa u'ati, Kaimana'oraz Kuwai,

Kaimana'o Doronaa dyuuda-kariwaiz aokazi iki ma'ozakan ida'an. Aimaakan kida kaikapa'oraz usha'a-painpanu'u tuukia'o angelnao aipan paaitapan udau'ati.

*Marii mashaapa-karu
kaimana'a naa*

13 Ukau'an, aizii udi'itinpa'a naa sakitapa usha'apata'azoonii kida dau'ati. Na'iki zaudinapa umashaapa, na'iki utaapa unyukunuu kaimanaiman uzaudapanii kida dau'ati, wuru'u Tominkaru kamunan-kida'azonuz unao, Jesus Christ kaawan dono'o naa. **14** Uizo'atiaba umashaapa Tominkaru ati, Tominkaru dainaoun idi unao. Aona'a naa umashaapa'ana'a pakawan usha'apapan dau'u oia'o, wuru'u unaudapanii kidaz usha'apaapauzon kiwiin, umaai-tapakan dono'oraz zii mishi'o parada-karu Jesus dau'u kida'oraz. **15** Mazan aizii kaimana'a naa pa'i umashaapa, aonaa u'opia'ana'a usha'apatanii kida ida'an, usha'apanum kau'an Tominkaru zaamata'oraz unao, kaimana'o uruu aonaa oia'o mani. **16** Na'apa Tominkaru paradan saada-kariwai ida'a. Tominkaru kian, "Kaimanainao pidannao pa'i unao, aonaa oiainao nii mani, usha'apanum kau'an kaimana'o õgaru, aonaa oia'o mani."^a

17 Utoriinpan dono, "waDaru" ukiauzon Tominkaru ati. Ukau'an ukichana'iki pa'i usha'apatan oia'o Tominkaru awun za'a, umashaa-

pan kawana'ati zii da'a'a imi'i baara'a. Usha'apanum idi aonaa na'ia'oram pidan Tominkaru taapan panaudapanii manawun, mazan ipai pidannao uaitapa na'apam nii papataka'utan ūsha'apaapanii kida kawana'ati. **18** Uaitapani'i naa Tominkaru kawinipinaatan pazaamatun unao, pakazannaata'azon idi unao, mazanu'o umishidapauzonii kida ai, utamakapaniaz kotua'o udkozu-daunnao mishidapauzonii kidaz. Aizii wuru'u ukawinipi-naata-kinaaz pakazannaatan unao, aonaa pataka'uina'aka'o nii mani gold oo silver kawan, **19** mazan Christ izain umanawunun ida'ana'a. Na'apa'o uruu Christ, pa'ina'o kaznizo zowii-kao kawan, aona'oraz na'iam udikaudan, taauzo-kariwaiz Tominkaru ati. **20** Kotu'u amazada sakadinan ua'ii zii, Tominkaru zaamatan Christ. Aizii kai amazada ikoda'anan di'iti'i naa, patokon uaidan naa uruu unao ati. **21** Uruu Christ ida'ana'a naa umishidan Tominkaru. Tominkaru kadishita-kida'oraz uruu pamawaka-kizi iki, na'iki taa'oraz umanawun-karu u'ati. Una'apan idi'o wuru'u unao mishidanuz tuukii Tominkaru, na'iki uzaudapan naa wuru dau'ana'a Tominkaru kowaadaniaz pataa'azon diina'iti'i.

22 Aizii kaimana'ora'a naa uchikainan u'opian ai, uizo'atin ida'an mishi'oraz parada-karu Christ dava'oraz. Uruu idi mishi'o umarainpaakan umin-mishidan-

^a **1:16** Leviticus 11:44-45; Leviticus 19:2; Leviticus 20:7

nao tuma. Umarainpaaka tuukii unyukunuu iki kida manawun. ²³Unaо, pa'inaada-kariwai'i naa pa'an, aonaa mawakauzo udarunaо di'iki'o kawanu'o mani, mazan aona'oraz umawakauzon di'iki'o pa'an. Tominkaru paradan karikano-nanu'oraz umashaapan ida'ana'o pa'an upa'inaada-kao. ²⁴Na'apa Tominkaru paradan saada-kariwaiz kida kian:

“Ipai pidannao pinidi
kawanu'o
na'iki īmanawun-tinpan
na'apa soosoi kawan.
Wuru'u pinidiz
mawaka'akauzo
na'iki soosoi waota'akauzo
pakadunaa ai.

²⁵ Mazan parada-karu Naobanai di'iki'oraz, karikaonanu'o nii una'an.”^b

Uruu wuru'u Kaimana'oraz Kuwai kowaadapa-kariwaiz u'ati.
2 ¹Ukau'an umuuda'a naa oii kida'o, wuru'u umariidinauzonuz, utaapinpauzonuz mishi'o kawan ukaimanan, ukishauzi-shorinuz, na'iki ukadakotinauzonuzu uiriban dau'u. ²Umashaapa na'apa pa'ina'o koraidaonaa shakata'akan kawan, zamazi'oraz na'iki aipa'oraz soo padaro dunuu karikaonan. Ukau'an na'apa'a naa uzamazi Tominkaru paradan dau'ati. Uruu koraidaonaa daro dunuu kawanu'o u'ati. Kaimana'o nii udyaupain u'ida'an, na'iki ma'ozaka'o nii umishidapan Tominkaru, na'iki

ukazannaatinan nii. ³Usha'apanum idi utiwaani'i naa na'apam Naobanai kaimanan na'iki na'apam ukamunanban.

Kakupa'o kuba kawanuinao

⁴Uwa'ati Naobanai Christ ida'ati, kakupa'oraz kuba ida'ati. Pidannao kashadaniaz, mazan Tominkaru zaamata uruu umanawunu'o nii. ⁵Uwa'ati kakupa'o kubanao kawanu'o nii kapam, ukaiwaa-kizinao kizi Tominkaru Dapunaa toma-kinao nii Kaimana'o Doronaa ida'an. Na'iki ukaudin-kizi kaimana'o faadaanao nii Tominkaru ati, na'iki taaina'o nii Tominkaru ati uaipan kawana'ati, Jesus Christ ida'an. ⁶Usha'apanum kau'an kaikapa'a saada-kariwai Tominkaru paradan kianu'u:

“Utukapa, ōmuudan kuba
Zion^c ii,
zaamata-kariwaiz
umanawunu'o kuba kabaun
kadishita-kida-kinao.
Aizii kanom mishida'o uruu,
aona'a nii uba'azootin-kida-
kao umishidan dikan ii
uruu.”^d

⁷Unaо mishidainao ati umanawunu'o wuru'u kubaz. Mazan mamishida-kainaо ati,

“Wuru'u kuba tomapauzonao
kabaun kashadaniaz,
madiwautapa-ka'oraz
ītukapan,
uru'u naa mishi'oraiman
umanawunu'o kuba

^b 1:25 Isaiah 40:6 ^c 2:6 Zion, oo Jerusalem. ^d 2:6 Isaiah 28:16

ipai ba'oran kubanao ai."^e
8Ba'oran saada-kariwai kian kapam.

"Uruu kuba tukurutin-kida'o pidannao,
 na'iki uruu kuba kaboina-kida'o īdyau."^f

Itukurutinan pamamishidakan id'i'o uruu dawa'a'o parada-karu. Mishi'o mazan Tominkaru aitan kawana'ati wuru'u na'apa'oraz sha'apan ī'ati.

9Mazan unao Tominkaru zaamataniinao pa'an papidanannao nii, kaudinainao nii faadaanao nii, uruu Naobanai ati, na'iki unao Tominkaru buutanii kaimana'o pidannao nii. Tominkaru idiwau unao, kakuwappa'o nii umanawunu'o usha'apatanii kida dau'ati. Unaо Tominkaru so'otanii umashaapa-kizi maruta'o bii iki, konaunama'o pakanadan ida'ati. **10**Kiwiitapa aonaa Tominkaru pidanannao mani unao, mazan aizii upidanannao unao. Kiwiitapa aonaa Tominkaru kamunan-kidan da'i unao, mazan aizii Tominkaru kamunan-kida'a naa unao.

11Ömarainapanii öribannao, öparada'azon u'ati, umashaapan idi tawarainaо nii di'ora'a amazada ida'a'a. Ukau'an aona'a naa usha'apaapa'ana'a dikauda kida'o aimaakan una'azootapanii kida, na'apa kida'o pataka'uan nii unao umashaapan ai kaiman. **12**Karikao-nanu'u naa umashaapa kaiman mamishida-kainao Tominkaru bii'i. Ídakotan pu'u usha'apaapan dikauda'o aimaakan, mazan itukapa kizi

pa'an usha'apatan kaiman kida'o aimaakan, uruu idi īmishidan nii Tominkaru. Aizii Tominkaru kaawan dono'o naa, īkonaukii-kidan nii umanawunun.

Naobanai-tinpainao paradan izo'ati-kao

13Naobanai Christ aipan ati, uizo'ati pidannao paradan taakariwainaouz wanaobanaanao nii. Uizo'ati king, umanawunu'oraz unaobanai-tinpan. **14**Na'iki uizo'ati wuru'u king waranu ainaouz nao-banainao governornao paradan, usha'apanum kau'an king dyuudanii īdyau pataka'uta'o nii maizo'ati-kainao paparadan. Mazan izo'atiinao uparadan, kaimana'o nii itaapa-kao.

15Tominkaru aipan unao sha'apatan kaiman kida'o aimaakan, umashaata kizi maaitapin-ka'o pidannao, iparadan ai maaitapinaka-daun unao dau'an. **16**Unaо, aona'ora'a naaupoitoruitapa-kao, mazan aonaa ukaiwa'ana'a wuru'u umashaapanuz na'apa udizapa-kinaa nii usha'apaapan oia'o, mishi'oraiman umashaapa Tominkaru poitorunao ni'i naa. **17**Utaapa ipai pidannao umanawunu'o nii. Umaraинапа umin-mishidannao. Ukichana'iki Tominkaru ai, na'iki utaapa umanawunu'o nii pidan naobanai-tinpa'o.

Mashaapa-karu kaiman naobanainao ati

18Poitoruinao, utaapa unaobanaanao umanawunu'o nii na'iki

uizo'ati ūparadan, aonaa unaobanaanao kamunaniinao ati mani karikaonan, mazan to'orabainao unaobanaanao ati kapam. ¹⁹Aizii unao, uaitapanii kanom Tominkaru aiapanii usha'apatan, ukau'an utuudan nii kaziwa'o ubaiaapan uantamikita-kao dono umasha'a-patakan pu'u oia'o, mazan uruu ida'ana'o nii Tominkaru nyukunuu kaimanan u'ati. ²⁰Kanom u'itiiman kaimana'o aimakan uikodan nii utuudan dono uzowiautapa-kao usha'apatan dikan ii dikauda'o aimakan? Mazan Tominkaru nyukunuu kaimanan u'ati utuudan dono ubaiaapan dikauda'o aimakan usha'apatan dikan ii kaimana'o aimakan. ²¹Kaikapa'o nii wuru'u Tominkaru dapadanuz unao, usha'apanum kau'an baiain-pa'a naa Christ unao dikan ii. Uruu pakaduz wuru'u Christ wa'akaniaz u'ati, ukau'an uda'ana'a naa ukaduz usha'apainpan ida'an uruu kawan. ²²Uruu Christ, aonaa usha'apatauzon oia'o, aonaa na'apainim umariidinauzon. ²³Aizii udakowapa-kao dono, aonaa udakoopan powaa iti pidannao dakoopainaouz paugaru. Upataka'uta-kao dono, aonaa ukaunaan powaa iti pidannao ati antamikitainaouz paugaru. Mazan ipai utaan pasha'apatakaoaz Tominkaru ati. Uruu pa'an wuru'u aitapa'o ni'oraz na'apam nii pasha'apatan pidannao ūsha'apatani kida kawana'ati. ²⁴Uruu Christ baiaapa'o wa'oian winipinaa, pamawakan ida'an cross paawa'a, wamuudin kizi'i naa oia'o ai,

na'iki wamashaapa kizi'i naa kaiman Tominkaru aipan kawana'ati. Ubaiainpā ida'an, ukakudan waunao. ²⁵Kiwiin unao, kaznizonao kawanu'o umakon pana'iti'i naa uka'uzatiki ai. Mazan aizii ukaawan powaa ati uka'uzatiki ida'ati. Uruu taapa'oraz unao.

Daiaroinao na'iki daiaruinao

3 ¹Unao na'apa kapam zunnao kaudaiaruinao, umashaapa kaiman izo'atiaaba udaiarunao ati. Udaiarunao mamishida'azookan an Tominkaru paradan, ūmishidan nii, uaida-kidan ida'an kaimana'o ukaduz ū'ati. Aonaa uparadinan pu'u mani padamata ū'ati, mazan upu'a'o nii utanawatin-kidan ūdyau Tominkaru ida'ati, ²umashaapan idi kaiman Tominkaru paradan aipan kawana'ati. ³Aonaa uaida'ana'a ukonaunaman umaodinpan ida'an mani karikaonan, oo ukai-wadapan ida'an mani karikaonan wizi'i kida'o aimakan, na'iki ukai-wadapan ida'an mani karikaonan konaunamada-kariwai ukamichan. ⁴Mazan marii pa'an uaidan ukonaunaman kaimana'o umashaapan ida'an unyukunuu iki'o, na'iki kadorona'o mashaapa-karu ida'an. Na'apa'o konaunama-karu aonaa na'apainim nii uwutan, na'iki na'apa'oraz konaunama-karu tuukia'o Tominkaru naudapan. ⁵Na'apa'o konaunama-karu kotua'o kaimanai-nao zunnao aidanii. ūmishidapan Tominkaru na'iki kaiman ūmashaapan izo'atiaaba pau daiaruinao ati. ⁶Utukapa Sarah dava'o, oroo izo'a-

ti'o pau daiaru Abraham, uruu idi odakotapan uruu panaobanaa nii. Unaо zunnaо, Sarah dainao wuru'u unaouz, umashaapan dono usha'a-paapan dau'u kaimana'o aimaakan kida oroo kawan, aonaa kanom aia'a naa utarian.

7 Unaо na'apa kapam daonai-oranaо kaudaiaroinao. Utaapa udaiaronao kaimana'o ida'an na'iki ukarodapa ūnyaun, usha'apanum kau'an uaitapanii aonaa na'apa kida'o mani ūma'ozakan unaо kawan. Mazan na'apa kida'o nii unaо tuma ūzaamatan Tominkaru kamunan-kinaа kakupa-karuz. Umashaapan dono na'apa, kaimana'o nii utoriinpan baokopa, aonaa'o nii kanom kasharutapa'o nii unaо.

Ipai mishidainaо Jesus ati'o

8 Aizii baukapa'akan naa ūkian, ipai unaо na'apa kida utaapa unyukunuу u'atiaaka uiribannao tuma. Umarainpakaа umin-mishi-dannao, na'iki ukamunanuaaka na'iki aonaa u'atadinpa'ana'a. **9** Aonaa ukaunaatin'a ana'a dikauدا'o idi usha'apata-kao dono dikauدا'o ida'an, oo aonaa uzunaapina'a-na'a powaa iti uzunaapa-kao dono. Mishi'oraiman ukaunaatin kaimana'o uparadan ida'an, upishaan ida'an Tominkaru kaimanan ū'ati. Usha'apanum kau'an Tominkaru kian utaa'azon kaiman-karu wuru'u udapadanuz unaо. **10** Saada-kariwai Tominkaru paradan kian,

“Konom mashaapa'azo'o konaukii

na'iki tukapa'azo'o
kaimana'o aimaakan
sha'apan pa'ati,
marii aonaa ukadakotinauzon
dikauدا'o ida'an,
na'iki marii umashaatan
pamaridinauzon.

11 Marii umuudan naa oia'o pakaduz, usha'apatan naa kaimana'o, udorotan naa kaimana'o mashaapa-karu, na'iki utiwaan naa pamashaapan kaiman pairibannao tuma.

12 Usha'apanum kau'an Tominkaru awunuutapanii kaimana'o pidannao, na'iki uabata ūtoriinpan dono pa'ati, mazan pidannao sha'apaapainao oia'o, aonaa manawun unaudapan.”

Mishidainaо Christ pataka'uta-kao kaimana'o dikan ii

13 Kanoma'o nii sha'apata dikauدا'o unaо ati usha'apapan an kaiman kida'o aimaakan? **14** Konaukia'o nii unaо, upataka'uta-kao an usha'apapan dikan ii kaimana'o aimaakan, ukau'an aonaa udopia'ana'a, na'iki aonaa utaria'ana'a pidannao sha'apata'azon an dikauدا'o ida'an unaо. **15** Mazan utaapa Christ kaimana'o unaobanaa nii unyukunuу ii, na'iki karikaonanu'u naa uminziwa-kidapa uparadan nii, uaitapa kizi na'apam udako'at-in pidannao, ipishaan dono unaо

umishidapan dau'an Tominkaru sha'apata'azooniaz u'ati. ¹⁶Na'iki udako'atin dono ūnyaun, kaiman uparada ū'ati. Na'iki kaiman utaapa unyukunuu, uaitapanii aonaa usha'apatan aimakan dikauda'o. Uruu ida'ana'o nii, pidanno ba'azoinpan dakoopainaouz umashaapan mishidainao nii Christ.

¹⁷Panaadon Tominkaru kashapan nii baiatin-karu kaimana'o sha'apaapa-kao dikan ii. Mazan kaimana'o wuru'u baiatin-karu ai oia'o sha'apaapa-kao dikan ii. ¹⁸Na'apa Christ, aonaa oia'o mani uruu, mazan upu'u utaainan pamawakan ida'an baupapa, aonaa powa'an kida mani wa'oian dikan ii. Uruu kaimana'o pidan, umawakan dikauda'o pidanno dikan ii. Christ sha'apatan kaikapa'ora'a una'aka kizi waunao Tominkaru ida'ati. Unanaa zowii-kao, mazan ukakuda-kao powaa iti Tominkaru Doronaa ida'an.

¹⁹Uruu Tominkaru Doronaa ida'ana'o Christ kakuwaapan doronainao ati ūtaraapa-kizinao ii. ²⁰Ūnao maizo'ati-kainaouz Tominkaru paradan, Tominkaru zaudapan pu'u kotua'iki ūtanawatinan pa'oian ai, na'iki ūizo'atin paparadan, Noah tomapan pu'u pakanawan. Uruu dono 8 sodi pidannoai paidinan kanawa zo'iti. Uruu ida'an ūkazannaata-kao wunu tuubaru'o ai, naraada'oraz ipai imi'i baara. ²¹Uruu wuru'u kainaabata'oraz chikaawunuin-karu, wuru'u kazannaatin-karuz Jesus Christ kadishita-kida-kao ida'an pamawaka-kizi iki. Aizii chikaa-

wunuin-karu, aonaa pidan nanaa chikaa-kao kaniriba'o ai mani kari-kaonan, mazan wapishaan pa'an Tominkaru usaabaa kizi wanyuku-nuu oia'o ai.

²²Jesus Christ mako'oraz naa aokazi iti, kai na'ii uruu Tominkaru diwa'ora antanapu, umanawunu'o unaobanai-tinpan ipai angelnao ati, na'iki ipai doronainao umanawun kidainao ūnaobanai-tinpan ati.

Mashaapa-karu Tominkaru ati

4 ¹Christ baiaapan idi kaziwa'o, ukau'an na'apa'a naa unao uruu kawan kapam, na'iki uma'o-zakadapa'a naa unyukunuu ubaiainpazon dau'ati. Usha'apanum kau'an, na'ia'oram unao baiaapa'o kaziwa'o pamishidan dikan ii Christ, aona'o ni'i naa usha'apaapa'azon oia'o. ²Ukau'an, aizii aona'a naa una'azootapa'ana'a oii kida'o usha'apaapauzonii, mazan una'an kawana'ati uizo'atipa'a naa Tominkaru. ³Unao kotua'iki'o usha'apaapauzon oia'o, maaitapakaina Tominkaru naudapanii kidaz pasha'apaapan. Unaudapa ukiaappaakan kakiba'azonna'o ida'an, unaudapa upo'idipan, unaudapa umakon madoronaa-daunu'o tuzapa-kizai ii aka, na'iki utomin-karuniitapanuz toma-kariwainao karikaonan. ⁴Uruu idi umin-sha'apaapauzon oii kida'o aimakan, tuukii ūdi'itinpan unao dau'an, aonaa ūaitapan kanom nii aona'a naa usha'apaapan dikauda kida'oraz aimakan powa'a. Una'apan idi'i naa ūdakoopan unao. ⁵Mazan

ĩdako'atin nii na'apa kida'a dau'an Tominkaru ati, uruu aitapa'o ni'o-raz na'apam pakawinipinaatan ipai pidannao kakupainao na'iki mawakainao kapam. ⁶Kaikapan id'i'o Kaimana'o Kuwai kowaadauzokaoaz mawakainao pidannao ati ĩkakupan pu'u zii. Ìnanaa pataka'uta-kao mawaka-karu ida'an na'apa ipai pidannao pataka'uta-kao kawan mawaka-karu idi, mazan upu'u karikaonanu'o nii ĩkakupan na'apa Tominkaru kawan Kaimana'o Doronaa ida'an.

Marii Tominkaru taanii kaiwaa-kao kaimana'o ida'an

⁷Ipai aimaakan kida ata'azoo ikitokon-tinan. Ukau'an aitapina'a naa umashaapa, karikaonan kizi udi'itinpan kaiman, turuu kizi utoriinpan kaiman Tominkaru ati. ⁸Na'iki powa'a'o zii umanawunun wuru'u marainpaaka-karu an, mishi'o ida'an. Usha'apanum kau'an kamarainpan-karu marina'ata-kida ipai oia'o. ⁹Udapaapa umin-mishidannao udapu ati, na'iki ukataan ĩ'ati, mazan aonaa unyukunuu oian bii an mani. ¹⁰Ipai unao kawana'ati Tominkaru taanii uka'iita-kinaa ni'l usha'apatan aimaakan umin-mishidannao ati. Ukau'an ukaminka'utaaka'a naa u'ida'an, na'iki ukaudina'a naa kaiman Tominkaru taanii u'ati ida'an. ¹¹Utaan an u'ati uka'iita-kinaa nii ukakuwaapan, ukowaada'a naa wuru'u Tominkaru di'iki'oraz kuwai. Aizii utaan an u'ati uka'iita-kinaa nii ukaminka'utan pidannao,

ukaminka'uupa'a naa wuru ida'ana'a ma'ozaka-karu Tominkaru taaniaz u'ati. Na'apa kizi ipai aimaakan kida sha'apata-kao Tominkaru konaukii-kida-kinao nii Jesus Christ ida'an. Uruu Tominkaru karikanoanu'o ni'oraz umanawunun na'iki uma'ozakan. Amen.

Baiainapa-karu Christ dikan ii

¹²Ömarainapanii ömin-mishidannao! Aonaa ukia'ana'a unyukunuu ii, "Kandii ni'o aimaakan sha'apan ö'ati kaikapa'a," utiwauta-kao an ubaiatan ida'an kaziwa'o. ¹³Mazan tuukii ukonaukii, usha'apanum kau'an ukaminauda'utan Christ wuru'u, upataka'uta-kao ida'ana'oraz na'apa Christ pataka'uta-kao kawan. Uruu powa'a zii kizi ukonaukian utukapan dono'o naa Christ umanawunun aida-kao, ukaawan dono'o naa. ¹⁴Konaukia'o nii unao, udakowapa-kao dono umishidan dikan ii Christ, usha'apanum kau'an umanawunu'o Doronai, Tominkaru di'iki'oraz kaina'an idi unao ida'a. ¹⁵Na'ia'oram unao pataka'uta-kao dono, aonaa kizi pa'i uzowian dikan ii mani pidan, oo ukoidimikitinan dikan ii mani, oo usha'apatan dikan ii mani dikauda kida'o aimaakan, oo ukimudautan dikan ia'o mani ba'oran pidannao ĩsha'apatin kizi kida dau'ati. ¹⁶Aizii upataka'uta-kao an umishidan dikan ii Christ, aonaa kanom dikan ii ukiba'azoo-kidanuzu, mazan ukonaukii-kida Tominkaru uaitapa-kao idi umishidapan Christ. ¹⁷Usha'apanum kau'an kaawa'a

naa amazada pidannao tiwa'azoo-kao kamoona, na'iki Tominkaru pidanannao wuru'u kiwiini'o ni'o-raz itiwaakao. Aizii umishiin dono waunao mishidainao tiwaa-kao kiwiin, na'apam nii dii pidannao sha'apata-kao aona'oraz iizo'a-tin Kaimana'o Kuwai Tominkaru dil'iki'oraz? 18 Saada-kariwai Tominkaru paradan kian,

"Aizii mani suduupa'o ida'an kaimanainao pidannao kazannaata-kao, aitaniimana'o nii dikaudainao na'iki oiainao pidannao, na'apam ni'l naa dii isha'apata-kao?"^g

19 Ukau'an, upataka'uta-kao an Tominkaru aipan kawana'ati, pakawan usha'apaapa wuru'u kaimana'oraz na'iki sakitapa'o-raz aimaakan. Na'iki pakawan utaapa unyukunuu Tominkaru ati, toma'oraz unao, uruu mishi'o nii usha'apatan aimaakan paparadan kawana'ati.

Kazowautapainao Tominkaru Choochin

5 1 Aizii õparada'azon choochi zowaunaanao ati. Õgaru choochi zowauna kapam, na'iki õtukapauzonii Christ pataka'uta-kao, na'iki õgaru ka'idiwaina'o nii kapam ukonaunaman na'iki umanawunun idi, uaida-kao dono ukaawan dono'o naa. 2 Kaiman utaapa Tominkaru pidanannao

utaapa-kidaniinaouz u'ati, na'apa kaznizo taapiki awunuutapan kawan pataapanii kaznizonao. Uawunuutapa idyaun minziwa na'iki konaukia'o ida'an Tominkaru aipan kawana'ati ushal'apatan. Aonaa uaipan idi mani uikodan aimaakan u'ati karikaonan, mazan utaan idi'o manawun unyukunuu uawunuutapa'azon dau'u idyaun. 3 Aonaa unaobanai-tinpa'ana'a wunao ati'i, taapa-kida-kariwainaouz u'ati, mazan uaida-kida kaimana'o sha'apatin-karu na'iki mashaapa-karu i'ati. 4 Aizii Christ, kaznizonao taapikinao zowau-naa kawanu'oraz kaawan dono'o naa, utaan nii unao ati aimaakan konaunama'o, aona'o ni'oraz ukonaunaman mainaabatinauzon, uruu wuru'u umanawunu'o uidiwau ni'oraz.

5 Aizii unao pa'inainao daonaioranao, uizo'ati tunarunao-tinpainao paradan. Na'iki ipai unao, na'apa kida utaapinapa, aonaa u'atadinpa'ana'a, ukaminka'uaaka pa'an u'atiaaka. Usha'apanum kau'an Tominkaru paradan saada-kariwaiz kian,

"Pana'iti Tominkaru taan panyukunuu atadinpa'o pidan ai, mazan ukamunan-kida pidan aona'o u'atadinpan."^h

6 Ukau'an aonaa u'atadinpa'ana'a Tominkaru umanawunu'oraz taapan pu'u unao, kaiman kizi uzaamatatan

^g 4:18 Proverbs 11:31 ^h 5:5 Proverbs 3:34

unao umanawunu'o nii diina'i-til'i paaitanii kamoo kaawan dono. ⁷Utaa Tominkaru ati ipai aimakan kimudauta'o na'iki kasha'oradauta'o unyukunuu. Usha'apanum kau'an utaapanii wuru'u unaouz.

⁸ Zaudinapa umashaapa utaruba Satan ai. Kaina'a uruu, uchi'ika'anpan na'apa zamazi'o baudokoru ka'arantina'o kawan, dorotapa'oraz pawanyukunuu nii. ⁹Aonaa ukashaapina'ana'a u'ati, mazan ma'ozaka umashaapa umishidapanii ida'a. Uaitapan idi umin-mishidannao mashaapainao ipai na'ia'akan di'oraz amazada ida'a, na'apa'o ībaiatinan unao kawan kapam. ¹⁰Mazan aonaa kotua'iki'o nii mani ubaiatinan dauna'an, uru'o ni'i naa kamunamba'oraz Tominkaru, zaamata'oraz unao Christ ida'an ka'idiwaina'o nii karikaonanu'o pakonaunaman na'iki pamanawunun idi. Usaa-baan ni'l'i naa unao powaa iti, na'iki uma'ozakadan nii unao kaimanaiman, mishi kizi umishidapan, aonaa kizi ukashadinan. ¹¹Marii

karikaonan umanawun-karu uruu ati'o nii. Amen.

Peter kowaadinan naa

¹² Ōsaadan di'oraz madiwau'u ōkaaritan unao ati, Silasⁱ kamina-ka'utan ida'ana'o ūgaru. Uruu kaimana'o ūmin-mishidan. Wuru'u ūsaadanuz ōkaaritan unao ati, ūaipan idi'o ūma'ozakadan unao na'iki ūtaan ūparadan mishi'o na'iki ūitapanii aimakan dau'a-na'o. Wuru'u di'orazu'u mishi'o kamunan-karu Tominkaru di'iki'o. Ukau'an, ma'ozaka umashaapa, uruu kamunan-karu ida'a.

¹³ Umin-mishidannao Christ, mashaapainaouz da'a'a Babylon ida'a,^j Tominkaru zaamataniinaouz papidanannao nii unao kawan, ūduudan paparadan unao ati. Na'iki Mark, ūtaapaniaz ūdani kawan, ūduudan kapam paparadan unao ati. ¹⁴Konaukii unaubaaka umin-mishidannao tuma ubaokopatinan dono.^k

Marii Tominkaru taan unyukunuu kaiman-kinaa nii unao mishidainaouz Christ.

ⁱ 5:12 *Silas*: Greek paradan ida'an, Silvanus kia'o wuru'u. ^j 5:13 *Babylon*: Rome dakotapa-kinao. ^k 5:14 Peter dono'o mishidainao baokopatinan dono, ūtukapakidan panaubaan oo pakonaukii-kidan pamin-mishidannao pakissitan ida'an ūdyauu pakaozoo ati oo pataawu ati oo panaadon paka'u ati.